



REPUBLIKA E SHQIPËRISË

ENTI RREGULLATOR I ENERGJISË
BORDI

VENDIM

Nr. 139, Datë 15.06.2021

MBI

KËRKESËN E SHOQËRISË “GREEN TECH” SH.P.K., PËR RISHIKIMIN E VENDIMIT NR. 115, DATË 26.04.2021, “MBI PËRCAKTIMIN E ÇMIMIT TË BLERJES SË ENERGJISË ELEKTRIKE TË PRODHUAR NGA BURIMET E VOGLA TË RINOVUESHME NGA ERA PER VITIN 2020”.

Në mbështetje të nenit 16, pika 5, të ligjit nr. 43/2015 “Për Sektorin e Energjisë Elektrike”, i ndryshuar; nenit 144, të Kodit të Procedurave Administrative të Republikës së Shqipërisë dhe nenit 16, të “Rregullores për Organizimin, Funkionimin dhe Procedurat e ERE-s”, miratuar me vendimin e bordit të ERE-s nr. 96, datë 17.06.2016, bordi i Entit Rregullator të Energjisë (ERE) në mbledhjen e datës 15.06.2021, pasi shqyrtoi relacionin nr. 89/3 prot., datë 11.06.2021, të përgatitur nga Drejtoria Juridike dhe e Zgjidhjes së Mosmarrëveshjeve dhe Drejtoria e Tarifave dhe Çmimeve, “Mbi kërkesën e shoqërisë “Green Tech” sh.p.k., për rishikimin e vendimit nr. 115, datë 26.04.2021, “Mbi përcaktimin e çmimit të blerjes së energjisë elektrike të prodhuar nga burimet e vogla të rinovueshme nga era per vitin 2020”,

Konstatoi se:

- Në vendimin nr.115, datë 26.04.2021, bordi i ERE-s, është shprehur për :
 1. *Miratimin e çmimit të mesatarizuar të blerjes së energjisë elektrike të prodhuar nga impiantet eolike me kapacitet të instaluar deri në 3 MW prej 75.64 Euro/MWh, për vitin 2020.*
 2. *Çdo ndryshim në aktet ligjore dhe nënligjore në fuqi, do të përbëjë shkak për rishikimin e këtij vendimi nga ERE.*
- Më datë 18.05.2021, në ERE është paraqitur shkresa e protokolluar me nr. 671 prot., e shoqërisë “Green Tech” sh.p.k., me anë të së cilës kjo shoqëri i është drejtuar ERE-s me kërkesë për rishikimin e vendimit të bordit të ERE-s nr. 115/2021.
- Në këtë vendimmarrje të bordit të ERE-s është parashikuar se: “*ky vendim hyn në fuqi menjëherë*”. “*Për këtë vendim mund të kërkohet rishikim në ERE brenda 7 ditëve kalendarike*”.
- Subjekti kërkues është njohur me përmbajtjen e vendimit të bordit të ERE-s nr. 115/2021, përmes faqes zyrtare të ERE-s në internet më datë 18.05.2021 si dhe është njoftuar zyrtarisht me shkresën e protokolluar në ERE me nr. 695 prot., datë 24.05.2021.

- Në nenin 16, pika 5, të ligjit nr. 43/2015, “Për sektorin e energjisë elektrike”, i ndryshuar, përcaktohet: **Çdo palë e përfshirë në një procedurë mund t’i kërkojë ERE-s, brënda 7 ditëve kalendarike nga data e marrjes së vendimit lidhur me atë procedurë, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabimet materiale të konstatuara.**
- Në nenin 16, pika 1, të “Rregullores për Organizmin, Funksionimin dhe Procedurat e ERE-s” miratuar me vendimin e bordit të ERE-s, nr. 96, datë 17.06.2016, përcaktohet si vijon:
1. Për një Vendim të Bordit, çdo palë e përfshirë në një procedurë mund t’i kërkojë ERE-s, brënda 7 ditëve kalendarike nga data e marrjes dijani të vendimit lidhur me atë procedurë, rishikimin e vendimit të bordit në rast se ka siguruar prova të reja që mund ta çojnë bordin në marrjen e një vendimi të ndryshëm nga i mëparshmi apo për gabimet materiale të konstatuara.
- Në kuptim të parashikimeve të nenit 3, pika 7, gërma “a” dhe gërma “b”, të ligjit nr. 44/2015, “Kodi i Procedurave Administrative i Republikës së Shqipërisë”, kërkuesit legjitimohen si palë në këtë procedurë për shkak të interesit të drejtpërdrejtë në këtë vendimmarrje.
- Për sa i përket afateve të parashikuara në dispozitat e Rregullores për Organizmin, Funksionimin dhe Procedurat e ERE-s, rezulton se kërkesa e shoqërisë për rishikim të vendimit të bordit të ERE-s është paraqitur brënda këtyre afateve, referuar marrjes në dijani përmes faqes zyrtare të ERE-s në internet dhe njoftimit zyrtar si më lartë konstatuar.
- Kërkesa për rishikim është përcjellë në cilësinë e provës së re, dhe si e tillë duhet të çojë ERE-n drejt marrjes së një vendimi të ndryshëm në lidhje me parashikimet e kësaj dispozite.
- Ashtu sikurse është konstatuar dhe arsyetuar në vendimin e ERE-s objekt i kërkesës për rishikim, në kontratën mes MIE dhe shoqërisë “GREEN TECH” sh.p.k., neni 8, pika 2 dhe neni 10, pika 3, është parashikuar se vlerësimi i investimeve mund të pësojë ndryshime të mundshme, me marrëveshje ndërmjet palëve, në çdo kohë gjatë zbatimit të projektit për ndërtimin e parkut eolik si dhe MIE bazuar në raportin përfundimtar të testimit dhe pas paraqitjes nga mbajtësit e Miratimit Përfundimtar të raportit të plotë të shpenzimeve për ndërtimit e veprës, lëshon Certifikatën e Pranimit të Veprës e cila do të përmbajë të dhëna reale tekniko-ekonomike të centraleve prodhuese, në mbështetje të Udhëzimit nr. 5, datë 13.10.2020 të Ministrit të Infrastrukturës dhe Energjisë “Për miratimin e procedurave për lëshimin, transferimin, modifikimin ose anulimin e “Certifikatës së Pranimit të Veprës” për prodhuesit me përparësi të energjisë elektrike nga impiantet që përdorin energjinë nga burime të rinovueshme”.
- Dispozita e parashikuar në pikën 2, të vendimit të bordit të ERE-s nr. 115/2021, në asnjë rrethanë nuk synon/tenton të cënojë të drejtën e garantuar të subjektit kërkues që ky çmim të jetë i pandryshuar për 15 vitet në vijim, por nisur nga fakti që në Shqipëri aktualisht eskperienca dhe të dhënat në lidhje me

ecurinë e investimit në këtë lloj teknologjie të prodhimit të energjisë elektrike mungojnë, ERE ka vlerësuar se në rast se aktet ligjore dhe nëligjore në fuqi (Kontrata koncesionare e lidhur mes palëve dhe autoritetit shtetëror, e cila është baza ligjore që legjitimon të drejtën e kërkuarit për të disponuar mbi të drejtën e shitjes së energjisë së prodhuar, referuar nenit 8, pika 2 dhe nenit 10 pika 3, mund të pësoje ndryshime), mund të ndryshojnë, ky vendim dhe vetë çmimi i përcaktuar janë objekt rishikimi, por pa përkeqësuar pozitën apo çënuar parimin e sigurisë juridike për palët e interesit.

- Dispozitat e neneve 144 e në vijim, në “Kodin e Procedurave Administrative” lidhen me situatën kur palët e interesit kërkojnë anulimin ose ndryshimin e një akti administrativ me justifikimin se ai/ajo, nuk ka qenë në gjendje të paraqesë rrethana specifike apo prova të reja me shkresë brenda procedurës administrative. Nëse mund të ishin paraqitur prova me shkresë ose rrethana të tjera nga pala në procedurën administrative ose në procedurën e ankimit, çka rezulton se pala nuk e ka bërë këtë, *atëherë nuk është e pranueshme të kërkohet rishikim, në mënyrë që organi publik të rihapë procedurën administrative dhe të lejohet të marrë vendim të ri mbi rastin. Parakusht i rishikimit është që pala nuk ka qenë në gjendje të paraqesë rrethana apo prova me shkresë ose të veçanta brenda procedurës administrative ose procedurës të ankimit.*
- “Provat e reja”, në kuptim të “Kodit të Procedurës Administrative” janë vetëm dokumente në formë të shkruar, të cilat janë të përshtatshme për të provuar pretendimet e palëve lidhur me fakte të rëndësishme të deklaruara nga pala në procedurën hetimore. Vetëm provat me shkresë mund të çojnë në rishikim. Edhe *rrethanat* në kuptim të parashikimeve të “Kodit të Procedurës Administrative”, nuk duhet të jenë “të reja”, por të zbulohen ose të mësohen rishtazi nga pala. Parakusht është që rrethanat të kenë ekzistuar tashmë në kohën kur është zhvilluar procedura administrative por nuk kanë qenë të njohura për palën dhe, prandaj, nuk janë paraqitur në organin publik.
- Në lidhje me sa më sipër, nuk rezulton të jetë e provuar as shkresërisht e as nëpërmjet shpjegimeve në lidhje me rrethanat e konstatuara pas vendimmarrjes së ERE-s, asnjë shkak ligjor që i vlerësuar në cilësinë e provës të çojë ERE-n në ndryshimin e vendimit objekt i kërkesës për rishikim.

Për gjithë sa më sipër, bordi i ERE-s,

Vendosi:

1. Rrëzimin e kërkesës së shoqërisë “Green Tech” sh.p.k. për rishikimin e vendimit të bordit të ERE-s nr. 115, datë 26.04.2021, “Mbi përcaktimin e çmimit të blerjes së energjisë elektrike të prodhuar nga burimet e vogla të rinovueshme nga era për vitin 2020”, si të pa mbështetur në prova të reja të tilla që mund të çojnë bordin e ERE në rishikimin e tij.

2. Drejtoria Juridike dhe Zgjidhjes së Mosmarrëveshjeve, të njoftojë palët e interesit për vendimin e bordit të ERE-s.

Ky vendim hyn në fuqi menjëherë.

Për këtë vendim mund të bëhet ankim në Gjykatën Administrative Tiranë, brënda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETARI I ERE

Petrit AHMETI